

## Қазақстан Республикасының Үкіметі мен Украинаның Министрлер Кабинеті арасында Әскери-техникалық ынтымақтастық туралы келісім жасасу туралы

Қазақстан Республикасы Үкіметінің 2004 жылғы 22 қаңтардағы N 67 қаулысы

Қазақстан Республикасының Үкіметі қаулы етеді:

1. Қоса беріліп отырған Қазақстан Республикасының Үкіметі мен Украинаның Министрлер Кабинеті арасындағы Әскери-техникалық ынтымақтастық туралы келісімнің жобасы мақұлданды.

2. Қазақстан Республикасының Қорғаныс министрі Мұхтар Қапашұлы Алтынбаевқа қағидаттық сипаты жоқ өзгерістер мен толықтырулар енгізуге рұқсат бере отырып Қазақстан Республикасының Үкіметі атынан Қазақстан Республикасының Үкіметі мен Украинаның Министрлер Кабинеті арасындағы Әскери-техникалық ынтымақтастық туралы келісім жасасуға өкілеттік берілсін.

3. Осы қаулы қол қойылған күнінен бастап күшіне енеді.

Қ а з а қ с т а н                      Р е с п у б л и к а с ы н ы ң

*Премьер-Министрі*

Жоба

## Қазақстан Республикасының Үкіметі мен Украинаның Министрлер Кабинеті арасындағы Әскери-техникалық ынтымақтастық туралы КЕЛІСІМ

Қазақстан Республикасының Үкіметі мен Украинаның Министрлер Кабинеті (бұдан әрі - Т а р а п т а р ) ,

1994 жылғы 20 қаңтардағы Қазақстан Республикасы мен Украина арасындағы Достық пен ынтымақтастық туралы шарттың мақсаттары мен қағидаттарына өздерінің адалдықтарын растай отырып ,

1993 жылғы 22 қаңтардағы Тәуелсіз Мемлекеттер Достастығына қатысушы мемлекеттердің мемлекетаралық құпияларды сақтауды бірлесіп қамтамасыз ету туралы келісімді басшылыққа ала отырып ,

Тараптар мемлекеттерінің өзара құрметіне, сеніміне және мүдделерін ескеруге негізделген өзара тиімді ұзақ мерзімді ынтымақтастыққа ұмтыла отырып ,

Тараптар мемлекеттерінің қорғаныс қабілетін нығайту қажеттілігіне сүйене отырып , төмендегілер туралы келісті:

**1-бап**

Осы Келісімнің мақсаты Тараптар мемлекеттерінің арасындағы әскери-техникалық ынтымақтастықты дамыту және реттеу болып табылады.

## 2-бап

Тараптар әскери-техникалық ынтымақтастықты Тараптар мемлекеттерінің ұлттық заңнамасына негізделген, Тараптар мемлекеттерінің ұлттық қауіпсіздігі мен қорғаныс қабілетін ғылыми, өндірістік және материалдық-техникалық қамтамасыз ету саласындағы келісілген қызмет ретінде қарастырады.

## 3-бап

Тараптар әскери-техникалық ынтымақтастықты мынадай бағыттар бойынша жүзеге асыратын болады :

1) Тараптар мемлекеттерінің қарулы күштері, басқа да әскерлері мен әскери құралымдары үшін келісілген әзірлемелерді, қару-жарақты, әскери техника мен басқа да материалдық құралдарды өндіруді, жаңғыртуды және жөндеуді, қару-жарақ пен әскери техниканың қазіргі түрлерін, жеке қорғанудың арнайы құралдарын жаңғырту және олардың жаңа түрлерін игеру мақсатында қорғаныс өнеркәсібі кешенінің қолда бар жөндеу кәсіпорындарын бірлесіп ұтымды пайдалану жөніндегі іс-шараларды жүзеге асыру ;

2) Тараптар мемлекеттерінің ұлттық заңнамаларына сәйкес бекітілген тізбелер бойынша қару-жарақты, әскери техниканы, қосалқы бөлшектерді, техникалық құжаттаманы және әскери-техникалық мүлікті жеткізіп беру;

3) қару-жарақты, әскери техниканы және басқа да материалдық құралдардың өндірісін бірлесіп құруға және өндіруге қатысатын кәсіпорындар мен ұйымдардың өндірістік және жұмылдыру қуатын, ғылыми-эксперименталдық базаларын сақтау және дамыту ;

4) осы Келісімге сәйкес бір Тараптың басқа Тарапқа шарттық негізде немесе бірлесіп іргелі, ізденістік және қолданбалы зерттеулер, перспективалық ғылыми-техникалық және технологиялық әзірлемелер, ғылыми-зерттеу және тәжірибелік-конструкторлық жұмыстар жүргізу;

5) қару-жарақ пен әскери техниканы стандарттау және біріздендіру, Тараптар мемлекеттерінің қарулы күштерін, басқа да әскерлері мен әскери құралымдарын метрологиялық қамтамасыз ету саласындағы өзара іс-қимыл;

6) қару-жарақ пен әскери техниканы жауынгерлік әзірлік жағдайында ұстаудағы өзара іс - қимыл ;

7) жауынгерлік пайдалануға жарамсыз қару-жарақ пен әскери техниканы кәдеге жарату жөніндегі жұмыстарды бірлесіп жүргізу;

8) қару-жарақ пен әскери техника сату әрі әскери және арнаулы мақсаттағы қызмет

көрсетулер саласындағы ынтымақтастық;

9) бір Тараптың екінші Тарап мемлекетінің әскери және өндірістік инфрақұрылымының элементтерін, жұмыс істеп тұрған және жаңадан құрылған полигондарының, ғылыми-зерттеу орталықтары мен зертханаларының мүмкіндіктерін пайдалануы немесе осы Келісімге сәйкес оларды шарттық негізде бірлесіп пайдалануы;

10) әскери топогеодезия саласындағы ынтымақтастық;

11) әскери-техникалық кадрлар мен мамандарды даярлау және оқыту;

12) әскерлерді басқару және техникалық қамтамасыз ету процесін басқаруды автоматтандыру кезінде қолданылатын немесе қолдануға жоспарланатын перспективалық ақпараттық технологиялардың біріздендірілген бағдарламалары мен техникалық құралдарын пайдалану саласындағы ынтымақтастық;

13) Тараптардың өзара келісімі бойынша басқа да бағыттар.

Тараптар арасындағы осы Келісім шеңберіндегі қаржылық, міндеттемелермен байланысты қатынастар жекелеген шарттармен реттелетін болады.

#### **4-бап**

Тараптар мемлекеттерінің осы Келісімді іске асыру жөніндегі Уәкілетті органдары мыналар болып табылады:

қазақстан Тарабынан - Қазақстан Республикасының Қорғаныс министрлігі, Қазақстан Республикасының Ішкі істер министрлігі, Қазақстан Республикасының Ұлттық қауіпсіздік комитеті, Қазақстан Республикасының Индустрия және сауда министрлігі;

украина Тарабынан - Украина Қорғаныс министрлігі, Украина Өнеркәсіптік саясат министрлігі.

Тараптар осы Келісімнің ережелерін іске асыру мақсатында әскери-техникалық ынтымақтастық мәселелері бойынша қазақстан-украина үкіметаралық бірлескен комиссиясын (бұдан әрі - Комиссия) құрады.

Комиссия Тараптар белгілеген мерзім ішінде өз қызметі туралы Ережені әзірлейді.

#### **5-бап**

Тараптар ынтымақтастықты мынадай нысандарда жүзеге асырады:

Тараптар мемлекеттерінің уәкілетті органдарының арасында халықаралық шарттар жасасу, әскери-техникалық бағдарламалар әзірлеу;

хаттамаларды ресімдей отырып, Комиссия мен оның жұмыс органдарының отырыстарын өткізу;

Тараптар мемлекеттерінің ұлттық заңнамаларына сәйкес Тараптар мемлекеттердің Уәкілетті органдары және/немесе Тараптар мемлекеттерінің кәсіпорындары мен

ұйымдары арасында шарттар (келісім-шарттар) жасасу;  
әскери-техникалық ынтымақтастықтың нақты мәселелері бойынша  
консультациялар өткізу, мамандар шақыру, тәжірибе және ақпарат алмасу.

## **6-бап**

Осы Келісімнің шеңберінде өнімдердің жеткізілімі, жұмыстарды орындау мен қызметтер көрсету Тараптар мемлекеттерінің ұлттық заңнамаларына сәйкес Тараптар мемлекеттерінің уәкілетті органдары арқылы ұйымдар шарттық негізде жүзеге асыратын болады.

Жеткізіп беру, жұмыстар жүргізу мен қызметтер көрсету көлемі мен тәртібі жекелеген шарттармен (келісім-шарттармен) реттеледі.

## **7-бап**

Тараптар жасалған шарттарға және Тараптар мемлекеттерінің әскери өкілдіктеріне берілген өкілеттіктерге сәйкес өз мемлекеттерінің кәсіпорындарында Тараптар мемлекеттерінің қолданылып жүрген техникалық және нормативтік құжаттамаларына сәйкес әскери мақсаттағы және осы өнімге жинақтаушы өнімдерді қабылдауды жүзеге асырады және қабылдау нәтижелерін өзара таниды.

## **8-бап**

Тараптар Құпия ақпараттарды өзара қорғау туралы үкіметаралық келісімді жасасқаннан кейін ғана құпия ақпарат алмасуды жүзеге асырады.

## **9-бап**

Тараптар зияткерлік меншік құқығын тиімді қорғауды қамтамасыз етуге міндеттенеді.

Тараптардың бір де бірі үшінші тарапқа беруші Тараптың алдын ала жазбаша келісімсіз қару-жарақты, әскери техниканы немесе оларды өндіру жөніндегі техникалық құжаттаманы, беруші Тараптан алынған немесе осы Келісімнің шеңберінде бірлесіп құрылған әскери-техникалық саладағы тәжірибелік және конструкторлық жұмыстар жөніндегі ақпаратты сатпайды және бермейді.

Ақпарат алмасу және зияткерлік меншік құқығын қорғау мәселелері жекелеген Келісімдермен реттеледі, көрсетілген Келісім жасалғанға дейін ақпарат алмасу және зияткерлік меншік құқығын қорғау мәселелері әрбір жеке шартта (келісім-шартта) ескертілетін болады.

## 10-бап

Осы Келісімнің ережелері Тараптар мемлекеттері қатысушылары болып табылатын басқа да халықаралық шарттардан туындайтын Тараптардың құқықтары мен міндеттемелерін қозғамайды.

## 11-бап

Осы Келісімге Тараптардың өзара келісімі бойынша осы Келісімнің ажырамас бөлігі болып табылатын жеке хаттамалармен ресімделетін өзгерістер мен толықтырулар енгізілуі мүмкін.

Осы Келісімнің ережелерді түсіндіру және қолдану жөнінде даулар туындаған жағдайда Тараптар оларды келіссөздер мен консультациялар жолымен шешетін болады.

## 12-бап

Осы Келісім бес жыл мерзімге жасалады және егер Тараптардың бірде бірі кезекті бес жыл мерзім аяқталардан кем дегенде алты ай бұрын оның қолданыста болуын тоқтату ниеті туралы дипломатиялық арналар бойынша екінші Тарапқа жазбаша хабарламаса, келесі бес жылдық мерзімге өздігінен ұзартылады.

Осы Келісім Тараптардың оның күшіне ену үшін қажетті мемлекетішілік рәсімдерді орындағаны туралы соңғы жазбаша хабарламасы алынған күннен бастап күшіне енеді.

Осы Келісімнің қолданыста болуының тоқтатылуы оларға қатысты өзгеше жазбаша уағдаластық болғаннан басқа жағдайларда, бұдан бұрын осы Келісімнің шеңберінде басталған бағдарламалар мен жобалар шарттарының (келісім-шарттарының) орындалуына әсер етпейді.

Осы Келісімнің қолданылуы тоқтатылған жағдайда Тараптардың әрқайсысы осы Келісімнің 9-бабының ережелерін сақтауды жалғастырады.

1994 жылғы 20 қаңтардағы Қазақстан Республикасының Үкіметі мен Украинаның Үкіметі арасындағы Әскери-техникалық ынтымақтастық туралы келісім осы Келісім күшіне енген күннен бастап өз күшін тоқтатады.

200 \_\_\_ жылғы \_\_\_\_\_ қаласында әрқайсысы қазақ, украин және орыс тілдерінде екі түпнұсқалық данада жасалды, әрі барлық мәтіндердің бірдей күші бар.

Осы Келісімнің ережелерін түсіндіруде келіспеушіліктер туындаған жағдайда Тараптар орыс тілдегі мәтінге жүгінетін болады.

*Қазақстан Республикасының  
Үкіметі үшін*

*Украинаның Министрлер  
Кабинеті үшін*

© 2012. Қазақстан Республикасы Әділет министрлігінің «Қазақстан Республикасының Заңнама және құқықтық ақпарат институты» ШЖҚ РМК